

honsell

COMUNICAZION**Honsell in vore par une Rai par furlan**

TANT CHE CONCUARDÂI vie pe riunon tignude lunis ai 16 di Avril te sede de Vite Catoliche il retôr de Universitât dal Friûl, Furio Honsell, ancje a non di politics, aministradôrs e cetancj rapresentants de stampe e dal associazionisim furlan, al è in vore par demandâ formalmentri un incuintri cui presidents des Cjamaris, Fausto Bertinotti e Franco Marini, par segnalâur lis claris ilegjitimitâts contignudis tal gnûf contrat nazionâl di servizi jenfri il ministeri des comunicazions e la Rai, la societât concessionarie dal servizi public radiotelevisif pal trieni 2007/2009, in teme di tutele des minorancis linguistichis storichis ricognossudis de leç 482/99.

«Viodût il rûl di garanzie dai presidents des Cjamaris – al à declarât il retôr – o sin

fiduciôs di cjatâ la dovude corispondence su un argoment cussì impuartant pe garanzie dai dirits democratics tal nestri Paîs, jessint la leç 482/99 diretomentri attuative di un principi fondamentâl de Costituzione: l'articul 6».

Secont i aministrativisj contatâts de Università e reste vierde la strade di ricori al Tar par impugnâ la mancjade prevision, al stât atuâl, des modalitâts di garanzie tai tiermins individuâts de Commission di vigilance Rai: lis determinazions de Commission paritetiche previodude dal contrat e/o chês de Agenzie su lis comunicazions. Favelant de legjitimazion atve, a son legjitimâts a lâ indevant sei la Region sei lis Provincis, tant che ents istituzionalmentri preponûts ae tutele des minorancis linguistichis.

